



Marie-Gabrielle Ineichen-Fleisch ha preschentà il rapport.

KEystone

Influenza da la libra circulaziun da persunas

Seco fa bilantscha

DA LUCAS DEPLAZES / ANR

Cun ses 15avel rapport da l'observatorium concernent la libra circulaziun da persunas tranter la Svizra e l'Uniu europeica infurmescha il Seco davart il svilup actual da l'immigrazion e l'integrazion da las persunas sin il martgà da lavour. Tenor quest rapport na dettia quai nagin squitsch sin las pajais en Svizra. Marie-Gabrielle Ineichen-Fleisch, la directura dal Seco, ha punctuà ier davant la medias a Berna la gronda munta da la cunvegna davart la libra circulaziun da persunas per l'economia da la Svizra e l'influenza sin il bainstar da noss pajais. La libra circulaziun da persunas lubeschia a l'economia svizra da recrutar senza cumplicaziuns las forzas da lavour necessarias e da reagir svelt en cas da mancanza. La populaziun svizra saja er cunscienta che midadas da structuras portian er avantatgs. La populaziun svizra – che laschia custar la scolaziun var 37 milliardas francs – saja la pli bain scolada sin il mund, ha constatà la directura.

Betg mo avantatgs

Ineichen conceda dentant che quella cunvegna ha giù consequenzas sin il svilup demografic da la Svizra. L'augment da la populaziun dals ultims onns ha er créa novs problems, principalmain sin ils secturs infrastructura da traffic, martgà d'immobiglias, ambient e scolaziun.

Il Seco è plinavant cunscient che na tuttas gruppas da la populaziun han pudì profitar dal svilup menziunà. Per ina part da nossa communitad munta la li-

bra circulaziun da persunas ina smanatscha. Per quest motiv ha il cussegl federal già decidì diversas mesiras cun la finamira da sustegnair l'atgna populaziun. Dapi in onn ston plazzas vacantas vegnir annunziadas al Center regional per intermediaziun da lavour (CIL). Persunas svizras duain avair prioritad per occupar questas plazzas. In ulteriur pass en questa

direcziun è ina correctura tar l'assicuranza cunter la dischoccupaziun per lavourers sur 50 onns. La directura dal Seco ha fatg attent che l'iniziativa che pretenda ina limitaziun da l'immigrazion pudess far donn a las relaziuns da la Svizra cun l'Uniu europeica.

54 600 persunas dapli

Boris Zürcher, il directur da la direcziun per lavour, ha constatà che l'immigrazion netto cun 31 200 persunas or da l'UE per l'onn 2018 è restada sin il livel da l'onn avant. Dapi l'onn 2013 cun in total netto da 68 000 persunas immigradas è sa reduci il dumber d'immigrazion per la mesasad. Las actualas prognosas quintan cun in augment conjunctural main aut per l'onn current. Questa prognosa conferma er il saldo da l'immigrazion per l'emprim quartal da l'onn 2019. Zürcher ha accentuà il svilup positiv da las pajais trant lavourers svizzers ed esters che demussia differenzas declarables. Per giuditgar l'influenza da l'immigrazion ston ins er resguardar la quota or dals pajais ordaifer l'UE. Quella è calculada sin 23 400 persunas (800 persunas dapli che l'onn 2017). Uschia s'augmenta il total da las persunas ch'han prendi dimora en Svizra l'onn 2018 tut en tut sin 54 600. Las persunas immigradas retiran dapli indemnisiations da l'assicuranza cunter la dischoccupaziun che lur contribuzions. Tenor il rapport menziunà munta la quota da persunas che fan diever da l'agid social tar ils lavourers esters trais procent, tar ils svizzers 2,3 procent. La cumpart dals lavourers esters tar nus munta a 32 procent.

Tadlar ils experts

Actualmain examinescha la cumissiun d'instituziuns politicas (CIP) dal cussegl naziunal l'iniziativa da la Partida populara svizra (pps) che pretendia ina limitaziun da l'immigrazion. Dapi l'introducziun da la libra circulaziun da persunas l'onn 2002 èn netto passa in milliun persunas immigradas en Svizra. Cumbain ch'ins possia constatar ina tscherta reducziun da l'immigrazion entran mintg'onn trant 60 000 ed 80 000 persunas en Svizra cun grevas consequenzas per noss pajais. La partida fa attent als problems d'integrazion, da scolaziun e tgira, da la surchargia da noss'infrastructura ed al privel da perder l'atgna identitad. Per quest motiv ha la partida inoltrà in'ulteriura iniziativa dal pievel cun la finamira da pudair controliar e diriger sez l'immigrazion, l'uschenumnada «Begrenzungsinitiative». Avant che prender posiziun duai la cumissiun dentant anc tadlar la posiziun d'experts en chaussa.